

香港浸會大學
HONG KONG BAPTIST UNIVERSITY

90 分鐘電影劇本:復活筆記

BY

HO KIN PONG

STUDENT NO. 05019885

BACHELOR OF SOCIAL SCIENCES
IN
COMMUNICATION (HONOURS)

Cinema and Television Department

Honours Project

HONG KONG BAPTIST UNIVERSITY LIBRARY

Honours Project Release Form

Student No. : 05019885

Author / Student Name : Ho Kin Pong

Honours Project Title : 90分鐘電影劇本:復活筆記

Degree Program : Comm-CTV

Year of the Honours Project : 2008

Declaration :

I agree that the full text of my Honours Project may be consulted by *any/all users* in electronic format online through Internet connection, and in print version for onsite use at the University Library, for purposes of private study, educational use, scholarship or research.

Signature of Author : 黃佩希 Date : 2/5/2008

90 分鐘電影劇本:復活筆記

BY

HO KIN PONG

STUDENT NO. 05019885

AN HONOURS PROJECT SUBMITTED IN PARTIAL FULFILMENT OF THE
REQUIREMENTS FOR THE DEGREE OF

BACHELOR OF SOCIAL SCIENCE IN COMMUNICATION (HONOURS)

DEPARTMENT OF CINEMA AND TELEVISION



HONG KONG BAPTIST UNIVERSITY

2ND MAY 2008

HONG KONG BAPTIST UNIVERSITY

2ND MAY 2008

We hereby recommended that the Honours Project by Ho Kin Pong entitled “90 分鐘
電影劇本:復活筆記” be accepted in partial fulfilment of the requirements for the
Bachelor of Social Science in Communication (Honours).

Dr. Lo Wai Luk Supervisor		Dr. Cheuk Pak Tong Department Head	
------------------------------	---	---------------------------------------	---

Continuous Assessment : B+

Product Grade : B-

Overall Grade : B-

Acknowledgments

I would like to express my gratitude to my chief adviser, Dr. Lo Wai Luk who has given me guidance throughout the entire scriptwriting process.



Student's signature

Department of Cinema and Television

Hong Kong Baptist University

Date: 2ND MAY 2008

90 分鐘電影劇本

劇名：復活筆記

故事簡介 / 戲劇框架：

年輕的主角得到了復活筆記之後，知道自己可以復活三個人，復活的人可活多一個月。主角在筆記上寫上媽媽和女朋友的名字。女友重生並和他繼續拍拖，但媽媽則沒有出現了。主角於是展開了他的愛的追尋。

人物簡介：

何樂軒，李芷晴的男朋友，二人多年來是幼稚園的教師。他一直怪責自己害死了自己的女朋友。復活筆記出現後，他在筆記上寫上了女朋友李芷晴和媽媽徐桂珍的名字。他和重生的女朋友一起尋找媽媽，但其實他不知道自己已經死了，是媽媽把他復活過來。

李芷晴，何樂軒的女朋友。生前一直隱瞞何樂軒有第二個男朋友。她復活後，想和樂軒分手，但被徐桂珍的大話欺騙，令她以為樂軒只剩下「最後兩星期」的命，願意陪伴樂軒共度他的「餘生」。之後她發現自己是復活過來，知道自己只剩下一日命，就告別了何樂軒。

徐桂珍，何樂軒的媽媽，因為有重病不想連累樂軒而跳樓自殺，豈料自己不死反而害死了救他的樂軒。之後她用復活筆記復活了兒子，然後失蹤，暗中跟蹤兒子。

故事大綱：

何樂軒一日驚醒，發現了有一本復活筆記在桌上。復活筆記可復活三個人，復活的人可活多一個月，他們都不記得自己曾經死過；如果他們知道了，他們就會只剩下一日命。主角在復活筆記上寫上了自己兩個最愛的人的名字——他的女朋友李芷晴和他的媽媽徐桂珍。芷晴重生了，不過徐桂珍則沒有出現。樂軒於是一邊享受和芷晴重逢的日子，一邊和芷晴一同尋找患有重病的徐桂珍。

二人一直都找不到徐桂珍，過程中芷晴有秘密聯絡她生前的另一個男朋友。她欲和樂軒分手，被有心失蹤的徐桂珍發現了。徐桂珍和芷晴會面，徐桂珍欺騙芷晴說樂軒有腦癌，只剩下兩個星期命，希望芷晴能夠和樂軒共度最後的時光，芷晴答應了。

芷晴回來樂軒身邊，把氣餒、找不到媽媽的樂軒振作起來。二人開心、甜蜜地過了一夜。翌日，芷晴發現了復活筆記有自己的名字，一股電流閃過她，她就記起自己三個月前已經因為車禍死了。她知道自己只剩下一日命，就告別了樂軒，告訴樂軒自己最愛的人是另一個男朋友，她要在最後一日和最愛的人在一起。一蹶不振的樂軒去了芷晴給他的地址尋找媽媽，仍然找不到。氣餒的他回到自己屋裡，徐桂珍原來已在屋裡煮好飯等著他，並安慰他。樂軒大為驚喜和感動。豈料二人一起吃飯途中，徐桂珍突然暈倒，樂軒大為緊張和傷心，送她到醫院。

在救護車途中，樂軒很傷心。突然徐桂珍的口袋跌了一張紙出來，樂軒認得這是復活筆記的紙，上面寫上了他的名字。一股電流閃過他，他記得自己原來已經死了。（事件是一個月前，他在天台欲救因為不想連累他而跳樓的徐桂珍，結果反被她一手拉下去，樂軒墮樓被車撞至身亡，徐桂珍則鈎在下層的掛衣架上，沒有死去。之後徐桂珍在復活筆記上寫上兒子何樂軒的名字，把他復活了，然後自己失蹤。）何樂軒在醫院記得整件事後，徐桂珍亦死了。樂軒表現得很平靜，他首先去到李芷晴的墳前和她道別，之後回到自己家裡，認真地煮好一餐飯，然後在復活筆記上寫上媽媽徐桂珍的名字。最後，他坐在餐桌上，呼喚媽媽的名字，媽媽的房門打開。

分場劇本

第一場

景：何樂軒的屋內

時：早上

人：何樂軒

何樂軒在床上彈起。

何樂軒：(驚慌地，好像發惡夢“紮”醒般叫著) 媽媽！媽媽！

何樂軒左望右望，見不到媽媽。

何樂軒下床，神色緊張地在屋裡找媽媽。

何樂軒仔細地找尋屋裡每一個角落，找不到。

何樂軒衝上天台。

第二場

景：天台

時：早上

人：何樂軒

何樂軒緊張地在天台找媽媽。

何樂軒仔細地找尋天台裡每一個角落，找不到。

何樂軒走到天台邊緣，伸頭望下去人來車往的街道。

第三場

景：街道

時：早上

人：何樂軒，警察，途人們

何樂軒和警察正在爭辯，一些途人在觀看。

何樂軒：差人大佬，你查清楚好嗎，人命黎架！

警察：先生，真係冇呀，冇人係呢度跳過樓呀！

何樂軒：(火爆地) 你有冇查清楚呀！我親眼睇住阿媽跌落黎架喎！

警察：我地幫你查得好清楚喇，查曬全港 18 區 20 年黎既跳樓紀錄，冇人係呢度跳樓，你阿媽都有跳過樓，你明唔明呀。(走上鐵騎離開)

途人對何樂軒指手劃腳。

途人甲：(竊竊私語) 佢係米傻架？

途人乙：（竊竊私語）咁人黎架，話自己阿媽死左都有既

途人丙：（竊竊私語）呢個年代真係多痴線佬

何樂軒：（精神恍惚，自語自語）冇可能既……冇可能既……我親眼睇住我阿媽跌落黎……

第四場

景：何樂軒的屋內

時：下午

人：何樂軒

何樂軒精神恍惚地回到屋裡。

何樂軒頹廢地坐在一張凳上。

何樂軒突然見到桌上有一本未見過的簿，他望著它。

何樂軒走過去看那本簿。

那本簿的簿面寫著「復活筆記」四個大字，下面寫著一句：「如果你可以復活最愛的三個人，你會復活誰？」

何樂軒認真地看著這個簿面，之後他翻去第一頁。

復活筆記的第一頁寫著「在筆記上寫下他們的名字，他們就會在床上出現」。

何樂軒認真地看著這一頁，之後他翻去第二頁。

復活筆記的第二頁寫著：

「本筆記的三條規距：

1. 本筆記只可復活三個人
2. 復活的人可活多一個月，之後不能再復活
3. 復活的人和他身邊的人都不會記得這人曾經死過，如果復活的人知道自己是復活過來，他只會剩下一日命」

何樂軒認真地看著這一頁，他皺一皺微頭，有點疑惑的樣子，之後他再翻去後面的頁數。

後頁的頁數全部都是空白的。

何樂軒看看簿的背面、簿脊，都是空白的。

何樂軒再將筆記翻來翻去，好像要找找筆記中還有什麼地方他看漏了。

何樂軒靜心地望著這本復活筆記，想著什麼，然後拿了一支原子筆，翻去一頁空白的頁面上寫上「徐桂珍 - 我的媽媽」，然後翻去下一頁空白的頁面，寫上「李芷晴 - 我的女朋友」。他隨即把筆記關上。

何樂軒坐著，他望望牆上的一張相。相中是兩個女人和他的合照。三人笑容燦爛，融洽地在餐館一起吃飯。年輕的女士是樂軒的女朋友，年長的一位是他的媽媽。

何樂軒望了一會，再坐了一會，就去打開媽媽的房門。

何樂軒望望媽媽房內，沒有任何人，床上沒有媽媽的蹤跡。

何樂軒亦失望又無奈，將手上的復活筆記恨恨地拋下去垃圾筒。

何樂軒：（無奈地）廢簿黎既！

此時家裡的電話響起。

何樂軒去接電話。

何樂軒：喂！

電話中的女聲：（開朗地）喂，阿軒呀，訓醒未呀你？

何樂軒：（呆了，口震）你……你……係芷晴？

李芷晴：係呀！我把聲你都唔認得！未訓醒呀你。

何樂軒：（驚訝，口震）你……真係阿晴？

李芷晴：係呀！做咩事呀你，今日有咩唔妥呀你。

何樂軒：（用力去定神）啊……冇野呀……

李芷晴：喂去唔去便利店食野呀？順便拎埋把遮比我呀，上次漏低左係你度呀。

何樂軒：啊……好呀……

李芷晴：咁一陣見啦，拜拜！

何樂軒：拜拜……（立即）喂喂……你真係阿晴？

李芷晴：係呀，李芷晴呀！你係米有好多個阿晴呀？

何樂軒：（固作震定）啊……唔係……我今日有少少累姐……

李芷晴：叫你唔好咁夜訓架啦，係咁啦，拜拜

何樂軒：拜拜……

何樂軒關上電話，呆一呆，望一望垃圾筒的「復活筆記」，小心翼翼將它拾起來。

何樂軒：（拿著筆記，自言自語）原來人真係可以復活……

何樂軒再走入媽媽的房間，媽媽不在，何樂軒顯得失望和難過。

何樂軒從一個盒中拿出李芷晴要的遮，盒中夾著一張剪報，寫著「欲見男友車禍死」。

第五場

景：便利店內

時：晚上

人：何樂軒，李芷晴，便利店侍應，十歲小孩

何樂軒站在便利店內的桌子旁等著，有點緊張，左盼右顧。

何樂軒望著便利店的門口，有一位女仕進入，不是李芷晴，他顯得失望和焦急。

何樂軒不斷地轉動手提電話。

門口再有一人進來，是李芷晴，何樂軒目不轉睛望著她，他要看真一點她。

李芷晴：喂，等左好耐呀！

何樂軒：（望著李芷晴的樣子）哦……唔係呀（繼續望著李芷晴的樣子）

李芷晴：阿軒你做咩呀？又未訓醒呀！

何樂軒：(回神) 哦……唔係呀……好似好耐冇見你，想睇清楚你

李芷晴：我把遮呢？

何樂軒將遮給李芷晴，他沉一沉思，疑惑你李芷晴是不是真的復活了。

何樂軒：係呢，你記唔記得我鐘意食咩呀？

李芷晴：下，點會唔記得呀(在便利店走一圈，快速地拿了樂軒喜歡的食物)係米呢啲呀？你既品味冇變掛？

何樂軒：(認真地) 冇……從來都冇變過……

何樂軒打開銀包，看著他和李芷晴的合照，再看看旁邊的李芷晴。

李芷晴：喂？你今日做乜姐你？神不守舍既！

何樂軒：(連忙關上銀包) 冇呀……睇下你個樣有冇變到渣嘛

李芷晴：咁有冇呀？

何樂軒：變得愈黎愈靚囉

李芷晴歡笑，何樂軒跟著歡笑。二人選購食物。

何樂軒：你記唔記得我地點識架？

李芷晴：下……我第一日返幼稚園做老師個陣識你囉

何樂軒：係呀，你記唔記得呀，我仲笑你拎個砵仔糕入黎食到成地都係

李芷晴：記得，都過左咁耐喇，有咩好提姐(繼續選購食物)

何樂軒咀角向上，豁然開朗，他相信李芷晴真的復活了。

一個可愛的十歲小孩拿著即影即有的相機在便利店走來走去在拍照。

李芷晴：好可愛呀個 deede !

何樂軒笑著，摸摸小孩的頭，拿了小孩的相機，對李芷晴拍照。

李芷晴微笑。

何樂軒搖搖相機，相機都沒有相紙出來。

何樂軒：(心知道李芷晴是復活過來，假扮輕鬆) 咦？冇既(將相機交給小孩)

何樂軒拿著食物去收銀處付錢。

第六場

景：街道

時：晚上

人：何樂軒，李芷晴，砵仔糕小販

二人從便利店走出來。

何樂軒左手拿著便利店食物袋，右手拖著李芷晴，在街上漫步。李芷晴右手拿著雪糕來吃。

何樂軒：今晚同你一齊，我好似返返去第一日同你一齊個種感覺。(幸福地笑著)

李芷晴：你個日咩感覺呀？

何樂軒：個日係我一生中最開心既一日。

李芷晴：嘩咁誇張架你

何樂軒：冇，即使要用十年命換個一日都係值得既

李芷晴：得喇得喇，唔好咁肉麻啦你

何樂軒：（低聲自語）估唔到個天比我再有呢一日

李芷晴：下？咩話？

何樂軒：冇，我想同你講對唔住

李芷晴：做咩無端端講對唔住呀？

何樂軒：嗯，唔知，因為我愛你，所以好想同你講呢句

李芷晴：咁怪既你今日

何樂軒：我會好好珍惜之後同你既日子

李芷晴：你又咁肉麻，係呢，聽日我地駛唔駛返幼稚園呀

何樂軒：唔駛呀，而加 d 學生放緊暑假

李芷晴：係喎，我差 d 唔記得左添，有 d 掛住班學生呀

何樂軒：過多兩個禮拜暑假完喇，同時我地米可以見佢地囉

李芷晴：嗯

何樂軒：呀，你等等。

何樂軒繼續拿著便利店食物袋，跑過去對面馬路，避開很多行駕中的車輛。

李芷晴看著他跑過去，擔心他被車撞到。

何樂軒走到對面馬路的砵仔糕小販檔。

何樂軒：唔該兩個砵仔糕呀，一個啡色一個白色走紅豆既唔該。

何樂軒回頭，舉起兩個砵仔糕，李芷晴禮貌式地笑了一下。

何樂軒再避開很多行駕中的車輛，差點被車撞到，回到這邊馬路。

何樂軒：（將砵仔糕交給李芷晴）你最鐘意既白色砵仔糕呀，走埋豆架喇

李芷晴：（開心中帶罵）傻左呀你，咁樣過馬路。

何樂軒：你鐘意米得囉！

二人一邊吃著砵仔糕，一邊繼續在街上漫步著。

二人經過一間關閉了的店舖，李芷晴望一望櫥窗內的晚裝。

何樂軒：你鐘意件衫呀？

李芷晴：你覺得我著起靚唔靚呀？

何樂軒：嗯，幾好

二人繼續漫步，步回到李芷晴的住所。

李芷晴：喂我到喇，遲啲見，拜拜。

李芷晴步入大廈，何樂軒依依不捨看著她的背影。

何樂軒：（衝入大廈）喂，芷晴！（拿出十字架頸鏈，載在芷晴的頸上）你載住呀，保平安架

李芷晴：（禮貌地笑）哦，多謝。有 lift 喇，拜拜。

李芷晴步入 lift，何樂軒依依不捨看著她的背影。直到 lift 門關閉之際，他再揮手和李芷晴道別。

第七場

景：何樂軒的屋內

時：晚上

人：何樂軒

何樂軒心情愉快，步伐輕鬆回到自己的屋裡。

何樂軒眼尾看到沙發上的復活筆記。

何樂軒坐在沙發，拿著復活筆記，掀到去女朋友名字那一頁。

何樂軒：(回味地笑)終於可以再見返你

何樂軒再把復活筆記掀到去「三條規矩」那頁，見到「復活的人可活多一個月，之後不能再復活」那條，變得沉重起來。

何樂軒：(沉重、認真地)晴，呢一個月我一定會對你好好，我唔會令大家後悔。

何樂軒再把復活筆記掀到去媽媽名字那一頁。

何樂軒：(沉重、認真地)媽媽，你到底去左邊……

第八場

景：醫院

時：下午

人：何樂軒，護士，病人阿伯，病人們

大堂內有不少病人。

何樂軒站在詢問處查問。

護士：徐桂珍女士呢幾日都有黎覆診喎

何樂軒：咁你地有冇見佢出現過呀

護士：冇喎

何樂軒：(有點怒氣)真係冇？你地有冇 check 清楚呀？

護士：check 清楚喇先生，真係冇呀

何樂軒顯得失望和無奈。

護士：佢身體咁差唔可以唔黎覆診架，你見到佢一定要帶佢黎呀

何樂軒：係，我知喇姑娘

護士：一係如果佢之後黎過我地聯絡返你呀

何樂軒：太好喇，唔該你

何樂軒步離詢問處。

病人阿伯：(坐在輪椅，自言自語)好耐冇見過阿珍囉……

何樂軒：阿伯，你幾時見過佢黎呀？

病人阿伯：成幾個月都有喇，都唔知佢去左邊囉

何樂軒：阿伯，你再見到阿珍打返電話比我呀（在紙上寫電話號碼，將紙交給病人阿伯）唔該曬你呀！

何樂軒的手提電話在響，他接聽電話。

何樂軒：喂。

李芷晴：喂我係餐廳等左好耐喇，你黎未呀？

何樂軒：（著緊地）喂喂唔好意思，我而加即刻過黎！

李芷晴：我走先喇

何樂軒：（大為緊張）唔好呀！你睇住餐牌先啦，我跑緊過黎喇！（加速步伐）我買左啲野比你呀，你等我一陣呀！

李芷晴：唉！好啦！

何樂軒掛線，立刻奔跑離開醫院。

第九場

景：餐館

時：黃昏

人：何樂軒，李芷晴，侍應，客人們

李芷晴用手托著頭，無聊地等著。

何樂軒衝入餐館，撞到侍應，倒翻了一杯水。水弄濕了何樂軒。

何樂軒：（憤怒）有冇搞錯呀你？你有冇睇路呀？（欲打侍應）

李芷晴衝過來拉著何樂軒。侍應連忙道歉，匆匆離去。客人們受驚，望著他們。

李芷晴：（不滿）你又咁惡做咩呀？

何樂軒：（仍有怒氣）咁係佢唔岩呀嘛，行路唔帶眼！都唔知份野有冇濕到添呀。

李芷晴扶著何樂軒回到坐位。

李芷晴仍然不滿，從袋裡拿出紙巾遞給何樂軒。

何樂軒用紙巾抹身。

李芷晴：你咁火爆為咩姐？

何樂軒：（收起怒氣）唔好意思，今日心情唔好，（有誠意地）我應承你，以後唔會，ok?（從口袋中拿出小豬豬毛公仔）

李芷晴面露喜悅。

何樂軒：晴，我專登去返上次個間精品店買架。上次我仲笑你細路女，我以後都唔會再笑你喇。

李芷晴：（接過公仔）多謝你呀，好得意呀個公仔

何樂軒：（情深地）晴，由今日開始，每時每刻我都會對你好好，我要你每分每秒都咁開心。

李芷晴：（微笑）係喎，你頭先去左邊咁耐呀？

何樂軒：(不開心) 唉……我搵緊我媽媽，佢好耐冇去覆診喇。

李芷晴：下伯母唔見左呀，會唔會同朋友去左旅行呀

何樂軒：(不開心) 佢就係無講低呀，我好擔心，佢有病仲周圍走

李芷晴：(拍拍樂軒肩膀，安慰) 唔曬擔心啦，伯母咁聰明一定冇事既，話唔定去左朋友度休養呢

何樂軒：(情深地，捉住芷晴的手) 晴，有你係我身邊真係好，你對我好重要
李芷晴微笑。

何樂軒：晴，你記唔記得我地第一次拖手係邊度呀？

李芷晴：邊度呀？

何樂軒：喱……個晚我地睇月亮，仲諗住係個湖度撈起個月亮個度呢……

李芷晴：哦……個公園？

何樂軒：係呀，食完飯再去過呀

李芷晴點頭。

第十場

景：公園

時：晚上

人：何樂軒，李芷晴

何樂軒和李芷晴手拖手在公園步行。

何樂軒：前面就係個湖喇，(微笑，低聲) 個度就係我第一次拖你隻手既地方。

李芷晴：(停下來) 喂好累呀，唔行咁遠喇(坐在旁邊的長凳) 就坐呢度啦。

何樂軒也坐在長凳上，用手攬著芷晴的肩膀。

何樂軒望上夜空，觀看夜星。

何樂軒：我會好似 d 星星，永遠都陪住你，一直咁守護你。

李芷晴：你唔駛去搵你阿媽咩？

何樂軒：我地一齊去搵。

李芷晴：(語氣平淡) 好呀。

何樂軒：你呢排方唔方便搬過黎住呀

李芷晴：我都想呀，不過唔知點解我好似冇見過爸爸媽媽好耐，我想陪佢地多 d

何樂軒：(自言自語) 哦，係既……咁耐冇見……

李芷晴：喂我要走喇，我約左佢地。

何樂軒：咁快呀，我送你返去呀

李芷晴：唔駛喇，我搭的士得喇

何樂軒：咁好呀，我送你去搭的士

何樂軒送李芷晴到馬路，幫她截的士，幫她開門關門，依依不捨目送她離去。

第十一場

景：何樂軒的屋內

時：晚上

人：何樂軒

何樂軒認真地用電腦製作尋人啓示，他小心調教文字和相片的大小，再加上「重酬」兩個大字。

何樂軒用印表機大量印尋人啓示。

尋人啓示上有著徐桂珍的相片和姓名、何樂軒的電話。

何樂軒在廚房製作蛋糕，做到入夜。他弄傷了手，繼續弄蛋糕。

何樂軒向李芷晴發出 sms：「晴，我每天都會像第一日般愛著你，每天愛你多一些，軒」。

何樂軒打電話給媽媽，沒人接聽。他若有所思。

第十二場

景：老人院

時：早上

人：何樂軒，李芷晴，老人院職員們，老人們

何樂軒在老人院詢問職員，附近有一群老人。

老人院職員：珍姐好耐都有黎過喎，我地打比佢都冇人聽

何樂軒：佢有冇講過話會去邊度呀？

老人院職員：好似又有聽佢講過喎

何樂軒：好，唔該曬你，如果你有消息話我聽呀

老人院職員：好，一定一定

老人們在附近對話。

老人甲：珍姐好好人架，成日黎探我地

老人乙：個仔都咁孝順，有福囉！

老人丙：珍姐係米病左呀？

何樂軒回過頭，微笑對著老人們說：多謝你地咁有心呀，如果你地見到珍姐記住話我知呀，等我搵返珍姐下次一齊探你地呀。

老人乙：好呀，我地幫你地毯式搜索佢出黎。

全人歡笑。

李芷晴此時來到。

李芷晴：（沒甚表情）唔好意思呀，我遲左起身。

何樂軒：唔緊要，我地去貼啓示呀。

第十三場

景：老人院附近的街道

時：下午

人：何樂軒，李芷晴，徐桂珍

何樂軒和李芷晴在街上貼尋人啓示，不停貼，貼了很多張，二人都有點疲倦了。李芷晴的手提電話響起，她望一望來電顯示，再望一望何樂軒。她見樂軒正在專心貼尋人啓示，然後悄悄地行去街角接這個電話。

李芷晴：（接電話）喂，喂我米叫左你等我電話囉，我話左今日同佢出黎架嘛對方說話，李芷晴在聽。

李芷晴：我未搵到機會同佢講呀，你比啲時間我啦，佢呢幾日仲煩緊搵佢媽媽呀。對方說話，李芷晴在聽。

李芷晴：好喇好喇，我今晚同佢講喇！喂，係咁先啦，我要搵返佢，拜拜！

李芷晴掛線，離開街角。

徐桂珍的背影入鏡，她聽到李芷晴的電話內容。

李芷晴匆忙回到何樂軒身邊。

何樂軒：（抹抹額頭的汗）咦，你岩岩去左邊？

李芷晴：去左廁所呀。

何樂軒：好喇！貼得差唔多喇！

李芷晴：嗯。

何樂軒：喂我帶你去一個神秘地方呀，我爲你準備左啲野呀！

李芷晴：好呀，有咩咁神秘呀？

何樂軒：去到你米知囉！（拖著李芷晴走）

第十四場

景：沙灘

時：晚上

人：何樂軒，李芷晴

何樂軒拖著李芷晴，帶她來到沙灘。

沙灘上滿佈蠟燭，砌成了「晴，I “心” U」的圖形。

李芷晴將眼睜大，目定口呆的樣子。

何樂軒拖著李芷晴行入“心”形的圖形中，二人坐下。

何樂軒：靚唔靚呀？我之前個晚通宵砌架！

李芷晴：（微笑）好靚，多謝你。

何樂軒：(微笑) 你鐘意就得喇

李芷晴：嗯，我好感動，軒呀，不過……(李芷晴想要提出分手之際，何樂軒巧合地走開了。)

何樂軒走去拿出昨晚整的蛋糕。他雙手拿著蛋糕，唱著生日歌，慢慢回到李芷晴身邊。

何樂軒：Happy Birthday to 芷晴，Happy Birthday to you……

李芷晴沒什麼表情，追熄蠟燭，微笑。

何樂軒：你唔好以為你唔講我就唔記得你生日呀，哈哈。

李芷晴：多謝你，我以為你呢排咁忙，唔會得閒理其他野。

何樂軒：有啲野我係唔會唔記得。(欲擁抱)

李芷晴強著微笑，和何樂軒擁抱。何樂軒很陶醉，李芷晴的眼睛左看右看，有點陶醉，不打算講原本要說的東西了。

何樂軒：你有咩生日願望呀。

李芷晴：我有個朋友，佢一直都好想拍一部屬於自己既電影，佢仲差少少錢，我想完成佢心願。

何樂軒：佢差幾多？

李芷晴：五萬。

何樂軒：你關埋雙眼誠心許願呀，你既願望就會成真。

李芷晴關埋雙眼，何樂軒情深的輕吻她的嘴唇。

李芷晴張開眼，也情不自禁輕吻了何樂軒。

何樂軒：一陣上你屋企呀

李芷晴：今晚……今晚唔好喇，我地睇星呀……

何樂軒：(幸福地笑) 聽曬你話。

二人一起躺在沙灘觀星。

第十五場

景：教堂

時：上午

人：何樂軒，李芷晴，徐桂珍，教友們

教堂內，何樂軒正在詢問教友們有沒有見過徐桂珍。李芷晴站在一旁。

教友甲搖頭。

教友乙：好似唔多覺眼喎。

教友丙：頭先好似見過佢係聖母亭個度祈禱喎。

何樂軒：(大為緊張) 真係？幾時既事？係聖母亭個邊？

教友丙：係呀，岩岩渣嘛，我係聖母亭個邊返黎。

何樂軒：唔該曬你(望向阿晴) 行喇，阿晴！

李芷晴：(快速望一望手機的 sms) 哎也，我 daddy 有急事搵我，你去搵伯母先呀，你搵到打比我！

何樂軒：哦，好啦(箭步離開教堂)

李芷晴向教友道別後，亦離開了教堂。

徐桂珍在教堂外的暗角看到李芷晴離開，跟縱著李芷晴。

第十六場

景：街道

時：上午

人：李芷晴，徐桂珍

李芷晴在街上行走，徐桂珍在後面跟縱著她。

李芷晴去到自動櫃員機拿錢，同時發現何樂軒的戶口過了一筆錢去她的戶口。她拿了五萬元出來。

徐桂珍繼續跟蹤著李芷晴。

李芷晴望向後面，看看有沒有人跟蹤著她。

徐桂珍躲在人群中，李芷晴見不到她。

第十七場

景：咖啡室

時：上午

人：李芷晴，徐桂珍，神秘男友，侍應

李芷晴步入一間咖啡室，坐在神秘男友旁邊。神秘男友有禮地拉凳。

徐桂珍躲在咖啡室外面，看著他們。

此時有一侍應不小心翻倒水杯。水弄濕了神秘男友。

神秘男友有禮地、微笑地回應侍應，再拿出紙巾抹乾自己的衫。

徐桂珍繼續在外面看著他們。

李芷晴將五萬元交給神秘男友。

神秘男友：多謝你，有左筆錢我部戲就搞掂，不過我要去北京度取景兩個禮拜，陪唔到你。

李芷晴：(幸福的微笑) 唔緊要呀，我等你。

徐桂珍繼續在外面看著他們。

神秘男友送上蛋糕。李芷晴很快樂，開懷大笑。二人交談甚歡。

神秘男友吻李芷晴的臉，李芷晴回吻他的臉。

第十八場

景：聖母亭

時：上午

人：何樂軒

何樂軒正在聖母亭走來走去，找尋每一個角落，都找不到媽媽。

何樂軒很疲倦，仍然繼續找尋。

何樂軒有點煩躁，雙手按著自己的頭，跪在地上，對著聖母像大叫：我媽咪到底去左邊呀？你可唔可以答我呀？

何樂軒佷氣餒，跪在地上，頭都按在地上了，動也不動。

第十九場

景：咖啡室的門外

時：上午

人：李芷晴，徐桂珍，神秘男友

李芷晴和神秘男友離開咖啡室。

徐桂珍躲在一角。

李芷晴和神秘男友道別，神秘男友走了。

李芷晴準備離開之際，徐桂珍在她面前出現。

李芷晴：(大為緊張、慌張、驚訝) 伯母?!……

第二十場

景：中央公園

時：下午

人：李芷晴，徐桂珍

李芷晴扶徐桂珍，坐在中央公園的長椅上。

徐桂珍：(氣弱加咳嗽) 你咩都唔駛講喇，男歡女愛我好明白。後生仔既野我唔理得咁多喇

李芷晴：對唔住呀伯母，我一直瞞住你地。

徐桂珍：(按著李芷晴的手) 我都知我個仔冇出息架喇，連女友都留唔住。

李芷晴：唔關阿軒事呀，係我自己衰，要怪就怪我啦

徐桂珍：(氣弱加咳嗽) 阿晴，我同你講點解我要避開阿軒呀。

李芷晴：係呀伯母，阿軒好擔心你呀，周圍咁搵你。

徐桂珍：我講你聽點解，你唔好話返比軒仔聽。

李芷晴：嗯。

徐桂珍吸一大啖氣，李芷晴專心地聽著。

徐桂珍：其實，當我知道軒仔有腦癌之後……

李芷晴：(大為震驚，難過湧現) 腦癌？

徐桂珍：(氣弱加咳嗽) 係呀……佢兩個月之前証實左有腦癌，我唔忍心佢仲要照顧我，我成爲左佢負累，所以我決定離開佢，等佢好好享受埋呢兩個月……

李芷晴：(難過) 點解佢唔同我講，阿軒，你唔好有事呀

徐桂珍：佢得返兩個禮拜左右

李芷晴：(愕然) 下？咁嚴重？

李芷晴極難過，不知所措，雙手掩著嘴。

徐桂珍：阿晴，我有一個要求，希望你應承我。

李芷晴：好呀伯母……

徐桂珍：希望你可以陪多軒仔兩個禮拜，陪住佢好好咁行埋呢程……

李芷晴：伯母……我……(望著徐桂珍的眼睛，想拒絕不知怎拒絕)

徐桂珍：(大力咳嗽，接近嘔的地步) 阿晴呀……(再大力咳嗽)

李芷晴：(扶著徐桂珍) 小心呀伯母……我送你返去先呀。你而加住邊呀(扶著徐桂珍離開)

第二十一場

景：徐桂珍的秘密居所

時：下午

人：李芷晴，徐桂珍

李芷晴扶著徐桂珍，來到這間破舊的閣樓。

李芷晴見到這間閣樓簡陋的傢俱，欠佳的衛生情況，再見到徐桂珍一個人無力地倒水。

李芷晴：(望著徐桂珍) 伯母，我應承你

徐桂珍：(把水杯給李芷晴，望著李芷晴的眼睛) 多謝你阿晴……今日我同你見過面既野，你唔好話返比軒仔聽，我唔想佢再花時間照顧我……

李芷晴：(捉著徐桂珍的手) 嗯，我明白架喇伯母，伯母你都要多 d 休息呀，要去覆診呀

徐桂珍：嗯，我會架喇，軒仔靠曬你喇

李芷晴：(認真的眼神) 嗯。

第二十二場

景：一處空地

時：黃昏

人：何樂軒，李芷晴

李芷晴來到空地，見到何樂軒沒精打采坐著。

李芷晴走到何樂軒的身邊。

李芷晴：阿軒？

何樂軒沒有反應。

李芷晴：阿軒？你有事呀嘛？

何樂軒：下？阿晴你黎左喇？

李芷晴緊緊地擁抱何樂軒。

何樂軒：（灰心）晴，我行曬聖母亭同教堂都有，行暈附近都唔見

李芷晴：（認真地）由而家開始，我每分每秒都唔會離開你。

何樂軒：（由灰心變振作，望著芷晴）阿晴……（有淚光）

李芷晴：起身喇，我地返屋企（扶何樂軒起身）

何樂軒：（極振作，彈起）好（開心地笑）

二人開心的笑。

第二十三場

景：何樂軒的屋內

時：晚上

人：何樂軒，李芷晴

二人回到家裡，李芷晴把鑰匙放在桌上，何樂軒在後面攬著她。

二人纏綿，激吻，激情地滾到床上激情一番。

第二十四場

景：報館

時：早上

人：何樂軒，李芷晴，報館職員

何樂軒看著報館職員，在電腦上設計尋人廣告的排版。尋人廣告上有徐桂珍的資料。

報館職員：得架喇先生。

何樂軒：唔該你。

何樂軒和李芷晴離開報館。

李芷晴：我地去買餸煮飯囉

何樂軒：好呀

第二十五場

景：露天的街市街道

時：下午

人：何樂軒，李芷晴，菜販

何樂軒和李芷晴逛露天的街市街道。

二人經過菜檔。

何樂軒：(拿起豆苗) 幾錢呀？

菜販：失收呀，四十蚊斤呀！

何樂軒：嘩，咁貴！

李芷晴：(笑) 唔緊要啦！好食咪得囉！

何樂軒：(笑) 嗯，我都係咁諗，最緊要我地幸福。

二人會心微笑。

買完豆苗後，何樂軒幫李芷晴拿餸菜。

第二十六場

景：何樂軒的屋內

時：晚上

人：何樂軒，李芷晴

何樂軒和李芷晴在廚房準備餸菜。

何樂軒在細心地切魚。

李芷晴在旁洗菜。

何樂軒：(望著李芷晴) 今日我覺得好幸福。

李芷晴：(幸福地笑) 我都覺得係，我地好似從來冇一齊煮過飯。

何樂軒：(笑) 以後都係咁，好冇？

李芷晴：(沉默，難過) 好……

飯已經弄好了，客廳的飯桌上擺滿了餸菜，李芷晴坐在等著。

何樂軒用手巾拿出一煲熱燙燙的湯出來，他們開始吃飯。

二人幸福地吃著飯，何樂軒不時夾餸餵李芷晴。

李芷晴：(望著何樂軒) 你有冇野瞞住我？

何樂軒：冇……

李芷晴：真係冇？

何樂軒：(沉默) 我唔講得架……

李芷晴：(沉默，難過) 唔緊要喎，你講啦

何樂軒：真係唔講得嘢……

李芷晴：算喇算喇，我地食飯啦(笑)

何樂軒走進房間，拿出一件晚裝出來，是他們上次看到的那件。

李芷晴：(開心) 嘩，好靚呀！多謝你呀！

何樂軒：你著起佢呀，你係全世界最靚的女人。

何樂軒打開唱機，李芷晴穿著晚裝出來。

二人在浪漫的音樂伴奏下跳舞。

何樂軒：人生真係好奇妙，呢一分鐘能夠同你跳一 part 舞，我好滿足。

二人擁抱著，李芷晴很陶醉，她的眼睛好像在思考應否繼續和何樂軒在一起，或者在思考自己離開何樂軒是否錯的決定。

第二十七場

景：何樂軒的屋內

時：早上

人：何樂軒，李芷晴

早上，李芷晴和何樂軒在煮早餐。

李芷晴：咦，冇曬鮮奶添

何樂軒：我落去買呀

何樂軒去了買鮮奶。

李芷晴發現沒有碗，找碗。

李芷晴在屋裡行來行去，想找碗之際，在一個櫃桶的暗格見到復活筆記和剪報。

李芷晴看到剪報有自己名字，大感疑惑。

李芷晴頸上的十字架鍊斷了，她接著鍊。

李芷晴打開復活筆記，見到自己的名字。立刻好像有一股電流流過她的腦袋。

第二十八場 (Flashback)

景：幼稚園對出的馬路

時：晚上

人：何樂軒，李芷晴，幼稚園學生

雨夜。雨下得很大。

在幼稚園對出的馬路，何樂軒和幼稚園學生站在一邊避雨。

何樂軒拿著手提電話，不耐煩、激動地說：你黎到未呀？班學生等左好耐喇！滴

到濕曬喇！

李芷晴帶著雨傘，剛好趕到來馬路的另一邊，她也拿起手提電話，不耐煩地說：
黎到喇！你咁勞燥做咩姐！

二人看到大家。

何樂軒：阿晴，呢度呀！快d啦！（關上電話）

李芷晴關上電話，拿著雨遮心急走出馬路，然後她被一輪高速行駕的車撞倒飛至
十米之外

何樂軒：（驚叫）阿晴！！！！！！

何樂軒跑出去馬路中心，跪在地上，看著流血不止的芷晴，狂哭，大叫。

第二十九場

景：何樂軒的屋內

時：早上

人：何樂軒，李芷晴

李芷晴記起自己死去，她望著復活筆記上自己的名字，呆了。

何樂軒此時打開大門，回到家裡，帶著鮮奶和鮮花回來。

何樂軒望著拿著復活筆記的李芷晴。二人對望無言。

何樂軒：（聲音低沉）你知道喇？

李芷晴：（聲音低沉）我記得返嚟，個晚我拎遮比你，我比車撞死左

何樂軒：係，對唔住，我好內疚。

二人沉默。

何樂軒：之後我將你復活返黎（話未說完，李芷晴已打斷了他的說話）

李芷晴：我係米得返一日命？

何樂軒：（忍痛地）係

李芷晴：（沉重）對唔住阿軒，我諗我要走喇

何樂軒：走？做咩走呀？

李芷晴：我最後一日想同我最鐘意既人一齊

何樂軒：你最鐘意既人……？

李芷晴：我最鐘意既人唔係你，我呢大半年都同第二個人拍緊拖，死之前都係

何樂軒：（震驚）咁點解你仲同我一齊？

李芷晴：（超沉重）我見過你阿媽……你阿媽話你有腦癌。

何樂軒呆了，沒有反應。

李芷晴：點都好啦，好多謝呢五年你同我一齊，我真係要走喇，希望你餘下既生
活開心快樂。

何樂軒呆了，沒有反應。

李芷晴：（將一張紙放在桌上）呢個係你阿媽上次抄比我既地址。走喇，保重。

何樂軒呆了，目送李芷晴離開。

何樂軒拿著那張地址，受了很大打擊的樣子，很頹喪，坐在地上。

第三十場

景：徐桂珍的秘密居所

時：下午

人：何樂軒

徐桂珍的秘密居所很破落，擺設比上次少了很多，可能徐桂珍已經搬走了。

徐桂珍不在。何樂軒在徐桂珍的秘密居所等著。

何樂軒仔細檢查屋裡的東西，看看有什麼線索。

何樂軒很疲累，很頹喪地坐在地上。

何樂軒的手提電話在響。

何樂軒：（接電話）喂？

對方說話。

何樂軒：（大為緊張）咩話？你見到相入面個個女人？係？中央圖書館？好！我即刻去！唔該曬你！

何樂軒立刻跑去中央圖書館。

第三十一場

景：中央圖書館

時：下午

人：何樂軒，圖書館員工

何樂軒在中央圖書館焦急地走來走來，找尋媽媽的蹤影，找不到。

何樂軒：（很暴躁地拿起圖書拋落地下）又話係度！邊條 XX 咁鐘意玩電話呀！！

何樂軒很頹喪地坐在圖書館地下。

圖書館員工：先生，我地圖書館要「山」門喇，不如你聽日再黎啦

何樂軒仍然很頹喪地坐在圖書館地下，沒有反應。

第三十二場

景：酒吧

時：晚上

人：何樂軒

何樂軒在酒吧喪飲酒。很頹喪。

第三十三場

景：街道

時：晚上

人：何樂軒

何樂軒帶著酒氣在街上行走，憤怒地「爆瓶」。

第三十四場

景：何樂軒的屋內

時：晚上

人：何樂軒，徐桂珍

何樂軒帶著酒氣回到屋裡。

徐桂珍正在廚房煮飯。

徐桂珍：軒仔，你去左邊度呀？做乜咁夜返既？

何樂軒：（驚醒）媽？（望著廚房的媽媽）點解你會係度既？（興奮和笑）你去左邊度黎呀？我搵得你好辛苦呀！！（抱住媽媽，哭）

徐桂珍：（緊緊抱著樂軒）軒仔，我知道曬你啲野喇！唔好難過，世上有好多好女仔！你仲有媽媽！

何樂軒：（狂哭）媽媽我好掛住你呀！

徐桂珍：嗯，乖，我地一路食飯一路講呀。

飯桌上擺滿了餸菜。二人坐著。

何樂軒：嘩，全部都係我最鐘意既餸菜。

徐桂珍：係呀，食飯呀。

何樂軒：（夾餸給媽媽）食呀媽媽。

徐桂珍：嗯，你呀，冇鬼用呀，要我返黎照顧你。

何樂軒：（可愛地笑）阿晴走左，你又唔知係邊，我真係好驚呀，你唔好再走喇

徐桂珍：傻仔黎既，媽媽幾時都係度（笑）

二人溫馨地吃飯，有講有笑。

突然，徐桂珍摸摸自己的心口，暈低了。

何樂軒：（驚叫）媽媽！！

何樂軒不停搖媽媽，徐桂珍沒有反應。

何樂軒：醒呀媽媽！

第三十五場

景：救傷車上

時：晚上

人：何樂軒，徐桂珍，醫護人員

救傷車上，醫護人員在急救徐桂珍。

何樂軒：（大哭，撲在媽媽身上）媽媽，你唔好有事呀，我咁辛苦先見返你，你唔好又「丟」低我呀。

突然，一張紙張從徐桂珍的衣服口袋裡跌了出來。

何樂軒拾起紙張來看，是寫了自己名字的一張紙。他認得，這張紙是復活筆記上的紙張。立刻好像有一股電流流過他的腦袋。

第三十六場 (Flashback)

景：天台

時：清晨

人：何樂軒，徐桂珍，途人甲

徐桂珍站在天台邊緣。

何樂軒趕上天台。

何樂軒：冷靜啲呀媽媽，唔好做傻事呀！

徐桂珍：軒仔，你比我死啦，我唔想再連累你！

何樂軒：媽媽，你唔會連累我呀！我有能力照顧你！

徐桂珍：我就係唔想你照顧我呀！你比我跳啦（再站出一點）

何樂軒再行近一點。

徐桂珍：再見喇軒仔！（開始跌下去）

何樂軒衝前，一手拉住媽媽，但媽媽跌下去的拉力太強，把樂軒都拉了下去，樂軒在跌下去之前撞暈了。

何樂軒和徐桂珍同時跌下去，徐桂珍巧合地鈎在下兩層的「浪」衫架上，沒有跌死。何樂軒則一直跌下去，到地面之際被一輪貨車撞到。

徐桂珍望著自己的兒子被車撞死了。

途人甲：救命呀！有人被車撞到。

第三十七場 (Flashback)

景：何樂軒的屋內

時：下午

人：徐桂珍

徐桂珍撲在桌上，傷心地狂哭。

突然有一本復活筆記在徐桂珍身邊出現。

徐桂珍將復活筆記翻來翻去，仔細地看。

徐桂珍在一頁空白頁寫下「何樂軒 - 我的兒子」。

第三十八場

景：醫院

時：清晨

人：何樂軒，醫生

何樂軒記起自己已經死去和媽媽用復活筆記復活他的過程，他望著紙上自己的名字，呆了。

醫生：（走到何樂軒身邊）對唔住，我地已經盡左力，你媽媽個病太嚴重。

何樂軒繼續呆，沒有反應。

醫生拍拍何樂軒膀頭，走了。

何樂軒慢慢去病床望一望媽媽的樣子。

何樂軒：（靠向媽媽低聲說）媽媽，我永遠都係咁愛你，你比我照顧你，媽媽。（親吻媽媽面額）

第三十九場

景：墳場

時：早上

人：何樂軒

何樂軒去到墳場，將鮮花放在李芷晴的墳前。

何樂軒：阿晴，多謝你，希望你永遠都幸福快樂，你永遠都係我最愛既情人。如果有機會，我會做一個更好既情人。對唔住。

第四十場

景：何樂軒的屋內

時：晚上

人：何樂軒，徐桂珍

何樂軒認真地在廚房洗菜。

何樂軒認真地在廚房煮飯。

何樂軒將餸菜放滿在餐桌上。

何樂軒拿出復活筆記，在最後的空白頁上寫上「徐桂珍 - 我的媽媽」。

一會兒後。

何樂軒：(坐在餐桌上) 媽媽，出黎食飯喇！

徐桂珍的房門打開。

完